

ITALIA.

ITALIA Prouinciæ Orbis primaria, vti nomen pro temporum, rerumque vicissitudine sæpius mutauerit; nam & Oenotria, Ausonia, Hesperia, Saturnia, &c. dicta fuit: sic etiam eius termini & fines variè ab Auctoribus describuntur: posterioribus tamen sæculis hi statuti; Flumen Varus, inde linea per Alpes Coctias, montem Adulam, Alpes Rheticas, adiunctaque iuga porro ad amnem Arsiam, Histriæ terminum; Hoc vnum latus, cetera maria alluunt. Ptolemæus eam in peninsulæ formam describit, quam maria tribus lateribus circumfundunt, vno vallunt Alpes. Priscis Scriptoribus assimilatur querno folio; Recentiores eam integri cruris humani non inconuenienter à coxendice ad imum vsque pedem effigie pingunt. Habet Italia dorsum, & seu in piscibus esse videmus à capite in infimam partem, spinæ formam, Apenninum: qui mons ex Alpibus, qua ab Infero mari recedunt oriundus, cum recto propemodum cursu Anconæ Vrbi appropinquare, in mare Superum ferri, & ibi finiri videtur: tamen inde rursus ab eo mari recedens, per mediam Italiam in Brutios, ac Siculum fretum fertur. Olim in hac Regione .M. C. LXVI. Vrbes extitisse Ælianus Auctor est. Guido Presbiter Rauennas, ex Igino, qui ante sexcentos Annos de Urbibus Italiæ scripsit, septingentas duntaxat fuisse eius temporibus scripsit. Hanc Italiam Blondus in Octodecim Regiones diuidit; Leander, nouemdecim. Suntque nomina

Antiqua

LIGVRIA
HETRVRIA
VMBRIA
LATIVM
CAMPANIA FELIX
LVCANIA
BRVTII
MAGNA GRAECIA
SALENTINI
APVLIA PEVCETIA
APVLIA DAVNIA
SAMNITES
PICOENVM
FLAMINIA
AEMILIA
GALLIA TRANSPADANA
VENETI
FORVM IVLII
HISTRIA

Regentia.

Riuiera di Genua.
Toscana.
Ducato di Spoleto.
Campagna di Roma.
Terra di Lauoro.
Basilicata.
Calabria inferiore.
Calabria superiore.
Terra d'Otranto.
Terra di Barri.
Puglia Piana.
Abruzzo.
Marca Anconitana.
Romagna.
Lombardia di qua dal Po.
Lombardia di là dal Po.
Marca Treuigiana.
Friuli, & Patria.
Istria.

Vmbilicum totius Italiæ in agro Reatino, Velinum lacum constituit Plinius; ex Varronis sententia. huic lacui vicinus est Ager Rosellanus; (Rosæa rura Velini, Virgilio) totius Italiæ fertilissimus; qui tantæ fertilitatis erat (teste Varrone) vt pertica in eo relicta postridie non appareret propter herbam; ob idque Italiæ fumen dictus. Olim dixere Campum Stellatæ, totius Italiæ solum amœnissimum: nunc verò, loca circa Bononiam & Mutinam, Blondo Auctore. Sabellicus Italici nominis principibus Urbibus, ex vulgi prædicatione, hæc epitheta ascribit; Dites Venetiæ, Mediolanum ingens, superba Genua, pulchra Florentia, Bononia ferax, Rauenna vetus, Roma sancta, & Neapolis nobilis. Descripserunt hanc Regionem ex veteribus C. Sempronius; M. Cato; Polybius lib. 2.; & diligentissimè, vt cetera, Strabo. Ex Recentioribus Blondus; Ioannes Annius Viterbiensis in Cōmentariis in Berosum, & ceteros Auctores cum eodem impressos; Volaterranus; Sabellicus; & Dom. Niger; sed absolutissimè Leander.